

Erich Bolinius

Erich.Bolinus@t-online.de

**(Bericht über den BSV Kickers Emden - Sendung „Flutlicht“ auf Radio Ostfriesland
Donnerstag, 10.5.2012 18.05 Uhr auf 94.0 bzw. 87,7)**

Leev Toehörers,

Spölen van de 1. Mannskupp van Kickers Emden worden in disse Saison in de Oberliga neet mehr dörföhrt. Worum dat so is, weten wi all. De Vereen is ja in de Insolvenz gahn. Nu könt wi uns up de komende Saison in de Landesliga freien. Aber ok al up de Fründskuppspölen. Villicht ja ok tegen hooger spölende Mannskuppen. Tegen Hannover 96 was ja so 'n Spöl plaant. Man dorvan is nix worden. Woran dat legen hett, weet ik neet. Dat was ja aber maal moi, dat toe hören. Nu spölt Hannover 96 in Ihrhove tegen 'n Oostfreesland-Utwahl. Villicht worden ja ok eenige Spöler van Kickers Emden in disse Mannskupp beröpen. Wenn dat na de Klasse van de Spölers geiht, muss dat wesen. **Bernd Grotluschen** oder **Manuell Menzel** sünd sükse Spölers, de dor inpassen.

Villicht sullten de Verantwoordlichen van Kickers wegen Fründskuppspölen hör Hannen ok maal na Holland utstrecken. Groningen spölt in de 1. Liga van Holland, so ok Heerenveen. Villicht aber ok tegen de BV Veendam De spölt in de Gjaltema-Stadion, de hett 'n Kapazität von 6.500 Sittplatzen. Worum nöhm ik de Naam van de Stadion? In mien Foetballtied hebb ik mit **Kerli (Cornelius) Gjaltema** spölt, de later in Bremerhaven as Störmer Profi worden is. Wi hebben mit uns Ü60-Mannskupp van SV Petjem in Bremerhaven vör noch neet so lang Tied tegen hum spölt. Aber dat Stadion in Veendam sall wall neet na hum nöhm worden wesen.

Ik sülvst hebb ik mit van mi traineerte Jögdmannskuppen faaker in Holland un bi uns tegen hollandske Mannskuppen Spölen dörföhrt Villicht klappt dat mit de 1. Mannskupp van Kickers Emden ja ok.

Sövöl toe de 1. Mannskupp.

Van de Jögdmannskuppen van Kickers Emden kann ik ok dit Maal blot Goeds vertellen. De **A-Jögdmannsskupp** wunn up egen Platz tegen Heidmühler FC mit 2:0. Un wall Langenhagen, de noch up de 1. Platz in de Neddersassenliga steiht, hör Spöl tegen Raspo Osnabrück mit 1:3 verloren hett, sünd de Jungs van Kickers Emden bit up een Punkt an Langenhagen rankomen. Dat lesd Spöl, un dat utgerekend noch tegen Langenhagen, word in Emden an 16. Juni anfleit. Dor komen seker mehr Toekiekers as bi dat Spöl tegen Heidmöhlen. De Jungs hebben dat ok verdeent, meen ik.

In de eerst Halvtied was de U19-Mannskupp na Menen van Trainer **Yasin Turan** toe harmlos. Eerst dör 'n Elfer, as **Gökan Bathaby** in de Straafruom umhauen worden was, gung Kickers dör hum sülvst in Föhren. Dat was in de 41. Menüte.

Na de Pausentee spölte Kickers beter. Nu wurr moi kombineert. Un na goed een Stünn skoot **Sebastian Bloem** dat tweed Tor för Kickers. As de Torwart van de Gast, **Lukas Gerdes**, na 'n Stöt (Tätlichkeit) an **Tido Steffens** ok noch rood sach, meente man in de Kickerslager, da dat noch mehr Toren gaff. Man Fleitjepiepen! De Elfer verskoot Sebastian Bloem. Dat is skaa, wall dat Torverhältnis villicht noch 'n Rull spölen kann.

Ok de **B-Junioren** van Kickers wunnen an lesd Wekenenn in Wallenhorst mit 5:1, nadem man tegen Nörden mit 1:2 verloren harr.

De Sieg tegen Wallenhorst was 'n heel wichtige Stapp in Richt Neetofstieg. **Tido Janssen** skoot in de 9. Menüte dat 1:0 un in de 29. Menüte dat 2:0 un drie Menüten later dat 3:0. Hat trick seggt man ja dortoe. Na de Halvtied kasserten de Jungs van Kickers Emden dat

Tegentor. Man **Hanno Poppen** un **Benjamin Neziraij** skoten noch twee Toren. Trainer **Joachim Harberts** was mit sien Mannskupp dit Maal heel un dall toefree.

So, nu as alltied, noch 'n kört **Foetballwitz**:

„Hebben Se dree Sekunnden Tied?“, fraggt een Toekieker de Schiedsrichter na Spölschluss. De nickkoppt toestimmend. „Dann vertellen Se maal alls, wat se over Foetball weten!“

So, leev Toehörers van Radio Oostfreesland,
ik hoop, Joe hett dat Plattdütsk gefallen, denn mien Motto heet ja alltied,
plattdütsk dürt netso as Kickers Emden – neet unnergahn.

Bit anner Maal

Joe

Erich Bolinius

ut Emden-Petjem.